

## NAQQIUT

Matuma aalajangiiffigisassatut siunnersuut 26. november 2013-meersoq taarserpaa.

**Ingerlatseqatigiiffiit Kalaallit Nunaannilu oqartussaasut whistleblowe-reqarnissamut aaqqissuussinissamut (kinaassutsimik ersersitsisuunngitsumik ilisimasamik ingerlatitseeqqiisinnaanermut periarfissiisumik) malittarisassiuunneqarnissaannut Naalakkersuisut peqquneqarnissaannut Inatsisartut aalajangiiffigisassaattut siunnersuut.**

(Inatsisartunut ilaasortaq Naaja H. Nathanielsen, Inuit Ataqatigiit)

**Akissuteqaat**

(Naalakkersuisut Siulittaasuat)

**Aappassaaneerneqarnera**

Kalaallit Nunaanni Whistleblowereqarluni aaqqissuussinissamut isumaliutissiissummut Nalaakkersuisut Inatsisinut ataatsimiititaliap qutsavigaat.

Nunatsinni innuttaasunik atornerluisoqarsinnaaneranik pinaveersaartitsisussanik suliniuteqartarnissanik ersarissisitsisussanik qulakkeerinninnissamut Naalakkersuisooqatigiit isumaqatigiissutaannut 26. marts 2013-meersumut ataatsimiititaliap isumaliutissiissutaa tulluuttoqarjussuuvoq.

Pissaanermik atornerluisoqarsinnaaneranik pinaveersaartitsisunik aamma torinngitsumik inatsisinilluunniit unioqquutitsilluni pisortat aningaasaataannik atuisoqarsinnaaneranik pinaveersaartitsilluni suliniutit ersarissuunissaat Naalakkersuisut kissaatigaat. Taamaattumik isumaliutissiissut Naalakkersuisut tapersorsorpaat, allaffeqarfinnilu sulisuusut atorfeqartitaanerminnut kinguneqartitsisoqarnissaanik ersissuteqaratik atornerluisoqarsinnaaneranik mianersoqqussuteqarsinnaanissaannut, tassa kinaassusertik paasitinnikkaluarlugu avammut nalunaaruteqarsinnaasarnissaannut aaqqissuussisoqarnissaa sulissutigissallugu piareersimallutik. Naalakkersuisuttaaq suliffinnut namminersortunut assingusunik aaqqissuussinissat piareersimaffiginiarpaat taamatuttaaq qulakkeerinnittussat, suliffiit namminersortut sulisuisa, nioqquutissanik pilersuisuisa pisisartuisalu, suliffimmi pissutsinik unneqqarissuunngitsunik inatsisinilluunniit unioqquutitsisunik pilersoqalissagalarpat ernumassuteqaratik nalunaarutiginnittarnissaanut periarfissiisussanik.

Uani pineqartoq tassaavoq ingerlatsivinni assigiinngitsuni aamma suliffinni namminersortuni suli misilinneqarsimaqqajanngitsoq. Justitsministeriaqarfik ataatsimiititaliamik pilersitsisimasoq isumaliutissiissummi erserpoq, ataatsimiititaliap taassuma ersarissartussaavai aaqqissuussinerit pisortat ingerlatsiviini maannamut atuuttut, taakku iluaqutaat ajoqutaallu nassuiaassuteqarfigissallugit. Taamaattumik siunertat pitsaasut tamakku piviusorsioqarfigit inatsisiliorfiginissaannut Naalakkersuisut maannakkorpiap tunngavissaqanngillat.

Tassunga ilanngunneqartussaavoq, soorlulittaaq isumaliutissiissummi ersertoq, pineqartup malittarisassiuunneqarnissaanut ilanngullugu nalilersuineq nalunaarsuisarnermut inatsisinut ataqatigiissinneqartussaavoq. Nalunaarsuisarnermut danskit inatsisaat Kalaallit Nunaannut atuutinnigilaq, maannamullu suli misissornerqarpoq Kalaallit Nunaannut kissaatiginartuunersoq danskit nalunaarsuisarnermut inatsisaata peqqussuteqarnikkut

nunatsinnut atuutsinneqalernissaa. Allamulli qiviarnissamut aamma periarfissaqarpoq. 2014-imi tamatuma paasineqarnerusinnaanera Naalakkersuisut neriuutigaat.

Allatut oqaatigalugu avataaninngaanniit isumassarsisinneqarnissarput pisariaqartipparput, naak uagut ilutigalugu nammineerluta pineqartumut eqqarsaasersuuteqaralarluta. Taamaattumik periarfissavut ammatittariaqarpavut, siunissamilu qanoq aaqiissuuteqarsinnaanissatsinnut kissaatigisatsinnik toqqaanissavut killilernatigit.

Aatsitassarsiorneq eqqarsaatigalugu periutsit nunarsuatsinnut tamarmut atuuttut atorlugit periuseqartariaqarpugut, niueqatigiiffissuarnilu suleqataasut annerpaat peqatigalugit. Manna tikillugu Kalaallit Nunaat silatusaarluni piumasaqaatinik, tunngavissanik nassuiaassutinillu nutaanik saqqummiussuinerlut siuttuusimannilaq. Peqqissaartumik aalajangiusimasimavarput niueqatigiiffissuit alaatsinaatsuarnissaat, nunarsuarmioqatigiinni periutsit nutaajunerpaat pitsaanerpaallu atulersinnaaniassagatsigit.

Kalaallit Nunaata pisuussutaanik iluaquteqarniarluni misissueqqaarnissamut piiasinnaanissamullu akuersissutissanik tunniussisoqassatillugu piumasaqaatissat tunngaviusussat, aatsitassanut inatsimmi ersarilluinnartumik tassunga tunngatillugu nalunaarsorneqarsimapput. Maannakkut piumasaqaatigineqareertarpoq aatsitassarsiorluni misissueqqaarnerit aamma piiasinnaanermut pisinnaatitsissutit isumannaatsumik ingerlanneqartassat sillimaniarneq, peqqinnissaqarneq, avatangiisit, pisuussutinik atorluanaanissaq aamma inuiaqatigiinnut ataavartitsisussamik atorluanaanissaq eqqarsaatigalugit. Suliffiutillit arlariit naligiimmik inissisimappata taava suliffeqarfiit pisortat pilersaaruserlutik misissuunissaannut annerpaamik tapersersuisinnaasut pingaarnerutinneqartarlutik.